

[0213]

ONBIKENDE MIDFRYSKE SKRIUWERS

1. *Daniel Martens Soon*, auteur fan it fers *Oan dy salmige* yn de frentsjerter *Dissertatio juridica inauguralis de quibusdam excellentioribus tacitorum pactorum speciebus* fan *Gerhardus Jacobus Keiser* (1722B), haw ik fan oannommen dat it in studint oan de frentsjerter akademy wie. Geane wy it frentsjerter matrikel der ris op nei, dan sjogge wy, dat op 18 sept. 1721 in *Daniel de Blocq a Scheltinga Frisius* yn it matrikel fan de frentsjerter akademy ynskreaun wurdt,

en op 31 oktober 1721 in *Daniel Blok Lyklama à Nyeholt*. Dat binne de iennichste fryske Daniels dy't ik tusken 3 juny 1716 en 7 maeije 1722 (de dei dat Keiser syn dissertaesje fordigenje moast) yn it matrikel foun ha. Yn it *Stamboek van den Frieschen Adel* fine wy Daniël de Blocq van Lijcklama à Nyeholt (forstoarn 9 okt. 1781, 79 jier âld) werom as soan fan Augustinus Lijcklama à Nyeholt, en hy kin dus net Daniel Martens wêze. Mei Daniël de Blocq van Scheltinga liket it better: hy is de soan fan Martinus van Scheltinga (en Amelia Mennoosd., Barones van Coehoorn), en it kin dus winliken net misse, dat Daniel Martens Soon hyt fan *Daniël de Blocq van Scheltinga*. Daniël de Blocq van Scheltinga is, allegearre wer neffens it Stamboek, berne 22 maart 1704, hat Siktaris fan Skoatterlân en boargemaster fan Drylts west, en waerd yn 1760 lid fan de Rekkenkeamer fan Fryslân. Hy troude 11 desimber 1735 mei Aletta Catharina Piëriusd. Lijcklama à Nyeholt.